

交誼典第六十一卷

宴集部紀事三

金史紇石烈牙吾塔傳塔不喜文士僚屬有長裾者輒以刀截去又喜凌侮使者凡朝廷遣使來必以酒食困之或辭以不飲因併食不給使餓而去司農少卿張用章以行戶部過宿塔飲以酒張辭以寒疾塔笑曰此易治耳趣左右持艾來臥張于牀灸之數十

李復亨傳復亨爲宣慰使奏乞禁宣慰司官吏不得與州府司縣行總管府及管軍官會飲

侯摯傳摯爲平章事改封蕭國公致仕居汴中有園亭蔡水濱日與耆舊讌飲

元史賽典赤瞻思丁傳瞻思丁分鎮四川宋將咎萬壽擁強兵守嘉定與賽典赤軍對壘一以誠意待之不爲侵掠萬壽心服未幾賽典赤召還萬壽請置酒爲好左右皆難之賽典赤竟往不疑酒至左右復言未可飲賽典赤笑曰若等何見之小耶咎將軍能毒我其能盡毒我朝之人乎萬壽嘆服續夷堅志定襄魏仲儀以經童出身得遼陽警巡院判將復應詞賦舉與同輩結夏課十日一宴集中一舉子物故他日旬會諸人感嘆存歿仍於故人設位少選食至諸人舉匕箸而設位者亦然合

座哭皆失聲竟至罷食

輟耕錄林昉田間書載會友人遊山檄云人有殘縑敗素繪一山一水愛之若寶售之必千金至於目與真景會則略不加喜毋乃貴僞而賤真耶求樂之真今日正在我輩春雪旣霽春風亦和或坐釣於鷗邊或行歌於犢外百年瞬息懽樂幾何肴核杯盤遂意所命毋以豐約拘也檄書馳告盍勇而前此文殊清新向予避兵雲間泗濱時其地有林泉之勝而無烽燧之虞同時嘉遯者皆文人高士因倣司馬溫公故事俾予作約語云百歲光陰萬物乃天地逆旅四時行樂我輩亦風月主人幸居同泗水之濱況地接九山之勝儘可傍花隨柳庶幾游目騁懷節序駸駸莫負芒屨竹杖杯盤草草何慚野蔌山肴雖云一餉之清懽亦是百年之嘉話敢煩同志互作遨頭慨元祐之耆英衣冠遠矣集永和之少長觴咏依然訂約旣勤踐言弗替用附於此以見真率之會不讓遊山之樂也

嘉興林叔大鏞掾江浙行省時貪墨鄙吝然頗交接名流以沽美譽其於達官顯宦則刲羔殺豕品饌甚盛若士夫君子不過素湯餅而已一日延黃大癡作畫多士畢集而此品復出捫腹闊步譏謔交作叔大赧甚不敢仰視遂揖潘子素求題其畫子素卽書一絕句云阿翁作畫如說法信手拈來

種種佳好水好山塗抹盡阿婆臉上不曾搽大癡笑謂曰好水好山言達官顯宦也阿婆臉不搽言素面也言未已子素復加一句云諸佛菩薩摩訶薩俱不解其意子素曰此謝語卽僧家懺悔也闕堂大笑而散叔大數日羞出見客人之鄙吝一至於此亦可慨已

京師城外萬柳堂亦一宴游

處也野雲廡公一日於中置酒招疏齋盧公松雪趙公同飲時歌兒劉氏名解語花者左手折荷花右手執杯歌小聖樂云綠葉陰濃徧池亭水閣偏趨涼多海榴初綻朶朶感紅羅乳燕雛鶯弄語對高柳鳴蟬相和驟雨過似瓊珠亂撒打遍新荷人生百年有幾念良辰美景休放虛過富貧前定何用苦張羅命友邀賓宴賞飲芳醕淺斟低歌且酩酊從教二輪來往如梭旣而行酒趙公喜卽席賦詩曰萬柳堂前數畝池平鋪雲錦蓋漣漪主人自有滄洲趣游女仍歌白雪詞手把荷花來勸酒步隨芳草去尋詩誰知只尺京城外便有無窮萬里思此詩集中無小聖樂乃小石調曲元遺山先生好問所製而名姬多歌之俗以爲驟雨打新荷者是也

瑯嬛記江都王宴客忽大雪寒甚子主剪紅紙爲日帖於壁上頃刻光生射照一室煖於三夏坐客

解衣

注

子主仙人也

無錫縣志楊鐵崖與雲林會飲某所楊脫妓鞋置杯傳飲雲林大恚而去

江陰縣志李時可名鳳元季居馬馱沙喜結客楊維禎嘗浮江過其家鳳訪之舟中器黃金犀毗相半也及鳳燕維禎瑪瑙作埒赤玉盤盛脯白玉斗盛漿皆盈尺佐酒歌舞又皆絕代維禎爲色動龍鳳中再徵粟助軍興再以萬石應後竟治巨艦浮海去不知所終

見聞搜玉張士誠弟士德豪占民田一日雪大作設宴邀門下士請各賦詩有張明善者醉題詞曰漫天墮撲地飛白占許多田地教衆口嗷嗷吃甚的早知如此誰道是國家祥瑞

列朝詩集楊廉夫游杭州訪瞿士衡於傳桂堂士衡之從孫宗吉年十四見廉夫香奩八題卽席倚和俊語疊出其花塵春迹云燕尾點波時有韻鳳頭踏月悄無聲黛眉顰色云恨從張敞毫邊起春向梁鴻案上生金錢卜歡云織錦軒窗聞笑語採蘋洲渚聽愁吁香頰啼痕云斑斑湘竹非因雨點點楊花不是春廉夫嘆賞謂士衡曰此君家千里駒也時席上以鞦韆行酒卽命製詞宗吉賦沁園春云一掬嬌春弓樣新裁蓮步未移笑書生量窄愛渠儘小主人情重酌我休遲醞釀朝雲斟量暮雨能使麴生風味奇何須去向花塵留跡月地偷期風流到手偏宜便豪吸雄吞不用辭任凌波南

浦惟誇羅襪賞花上苑祇勸金卮羅帕高擎銀瓶低注絕勝翠裙深掩時華筵散奈此心先醉此恨誰知廉夫大喜命妓敲歌以行酒極歡而罷

明外史宋濂傳濂嘗與客飲帝密使人偵視翼日問濂昨飲酒否坐客爲誰饌何物濂具以實對帝笑曰誠然卿不朕欺

秦從龍傳從龍生日太祖與世子皆贈遺或親至其家燕飲

見聞搜玉方正學偕葉夷仲輩夜登山絕頂飲酒望月劇談千古竟夕不眠因曰昔蘇子瞻與王定國諸公登桓山吹笛飲酒乘月而歸以爲太白死三百年無此樂矣斯樂又子瞻死三百年後所無也諸君皆大笑 大和劉伯川善觀人陳孟潔楊士奇皆以故人之子入見因雪留飲命各賦

詩潔云十年勤苦事難留有志青雲白玉堂會待春風楊柳陌紅樓爭看綠衣郎奇云飛雪初停酒未消溪山深處踏瓊瑤不嫌寒氣侵人骨貪看梅花過野橋伯川顧潔笑曰風流進士顧奇笑曰子當大用尙勉之卒如其言豈非詩言志耶

明外史潘簡王模傳模子康王佖惇嗣景泰中數與州官置酒大會巡撫朱鑑以聞帝令諸王非時

令壽節不得輒會有司飲酒著爲令

見聞錄陳白沙家在新會兩司往返幾日談論至午刻留款止魚飧而已家甚清淡

客座新聞崑山葉文莊公盛爲禮侍轉吏侍禮書桐廬姚公變治宴於公臺質之及暮復於私第宴葉公公謝曰何勞鄭重姚公曰某鄉里親友干謁者衆煩公垂意公唯唯而已無何姚公進太宰公置酒往賀執杯獻於姚公曰今日送鄉里還先生矣文莊處事之善如此

常熟縣志雅集亭在致道觀北麓令計宗道同沈周楊循吉輩凡十有六人觴咏其處沈周繪雅集圖宗道爲記

太倉州志弘治年間一日會宴靖逸先生宅式齋先生後至諸公方分韻賦詩謂先生曰君當得某韻先生亟索筆賦詩七言律立就始登席前輩風流不可及矣

賢奕編董損齋公成進士後以差過岳州時劉忠宣公宅憂在里造謁焉忠宣留之飯飯麥糲饌惟糟蝦無他具公因感省終身持雅操云噫嘻賢喆之相與以有成也豈在情好周洽語意懇款哉雖然亦存乎人耳昔胡絃晦庵無隻雞斗酒之共而釀成禁學之禍董公顧以是感奮勵修其識豈

不遠哉

見聞搜玉張莊簡公悅有言客至留饌儉約適情餽隨有而設酒隨量而傾雖新親不擡飯雖大賓不宰牲匪直戒奢侈而可久亦將免煩勞以安生

異林曾公槩偉容幹善飲喜啖人莫測其量張英國輔欲試之密使人圍其腹作紙桶置廳事後命倉頭視公飲飲幾許如器注桶中乃邀公飲竟日桶已溢別注甕中又溢公神色不動夜半英國具舉從送歸第屬使者善侍之意公必醉坐伺使者返命公歸亟呼家人設酒勞舉隸公取觴復大酌隸皆醉公方就寢英國聞之大驚史百戶者性嗜飲晝夜沉醉不少醒嘗旦謁上官與之語懽

然無所答上官怒叱之曰汝醉耶其父聞之遂絕其飲久之病且作吳中名醫莫療有張致和者善於脉理診之曰夜半當絕勿復紛紛及期果欲絕其妻泣曰汝素嗜飲酒今死矣然久不得飲聊薦一杯與爾永訣當死無恨遂啟其齒以溫酒灌之須臾鼻竅綿綿若有息焉又灌之而唇動又灌之而漸甦以報致和致和曰彼以酒爲生酒絕則生絕慎勿藥之當飲以醇酒耳如其言果愈又飲數年乃終

道旃璣言正德丙子東塘毛公巡按河南華泉邊公督視學政會飲華泉命承差酌酒勸飲毛公曰承差差矣乎邊公曰副使使之也二公文雅並見

明外史李東陽傳東陽罷政居家購請詩文書篆者填塞戶限頗資以給朝夕一日夫人方進紙墨東陽有倦色夫人笑曰今日設客可使案無魚菜耶乃欣然命筆移時而罷其風操如此

見聞搜玉一布衣與謝方石契厚以故李西涯閣老器重之邀飲間適有臺諫數人與席置布衣上坐諸客爲之不平有以花酒令難之不堪者罰以巨觥布衣卽答曰園林到處消得酒風雨等閒落盡花諸客竟爲改容

江南通志何唐字宗堯桐城人正德辛巳進士少孤貧沉潛有大志以斯道自任嘗布袍跣跣過大司寇錢如京第京方宴客帷錦綺觴金玉聞唐至易以練繒瓦缶乃迎入其爲人所嚴憚如此

明外史吳嶽傳知廬州時王廷守蘇州以公事過京口嶽召爲金山遊攜酒一瓶肉一斤菜數束廷笑曰只是乎嶽亦笑曰吾兩人食足矣懽竟日而還

李中傳中守官廉自廣西歸欲飯客貸米鄰家米至又乏薪將以浴器爨會日已暮竟不及飯而別

張居正傳居正還朝所過郡邑牙盤上食水陸過百品吳中善庖者召募且盡道經襄陽襄王出候要居正宴故事雖公侯謁王執臣禮居正具賓主而出過南陽唐王亦如之

沈鍊傳鍊爲錦衣衛經歷鍊爲人剛直嫉惡如讎然頗疏狂每飲醉輒箕踞笑傲旁若無人錦衣帥陸炳善遇之炳於嚴嵩父子交至深以故鍊亦數從世蕃飲屢忤世蕃世蕃以酒虐客鍊心不平輒爲反之世蕃憚不敢較

列朝詩集汪道昆字伯玉歙縣人伯玉以襄陽守遷臬副丹陽姜寶以翰林出提學四川道經楚省會飲于黃鶴樓伯玉舉杯大言曰蜀人如蘇軾者文章一字不通此等秀才當以劣等處之衆皆愕眙姜亦唯唯而已數日會餞伯玉又大言如初姜笑而應之曰訪問蜀中胥吏秀才中並無此人想是臨考畏避耳衆爲闐堂大笑伯玉初不以爲愧此事殊可入笑林也 郭第字次甫長洲人嘉

靖戊午寶應朱子价爲南主客建康顧孝常在太常何元朗方去翰林姑蘇文德承黃淳甫避寇客留都次甫至自泰山與金子坤及孝常諸弟爲文酒之會篇篇傳播海內以爲美談

賢奕編方司徒鈍有郎差臨清者諄諄誨之曰往聞薦紳過此者必具豐餽華燕今民窮極矣如此

皆膏脂非爾我所藉以奉人面皮者召同鄉中士紳飲序以齒列不論官座中常有進士以齒加於京堂上者具常惡草而情固款洽也

塵餘萬曆初江陵張相與司禮馮內使交驩甚一日會飲蒲州張相與焉江陵爲令曰一枝紅杏出牆來裏面也好外面也好司禮曰杖藜扶我過橋東我也靠你你也靠我蒲州曰滿地榆錢不當饑這也使不得那也使不得

列朝詩集屠隆字長卿遨遊吳越間尋山訪道嘯傲賦詩晚年出肝江登武夷窮八閩之勝阮堅之司理晉安以癸卯中秋大會詞人于烏石山之鄰霄臺名士宴集者七十餘人而長卿爲祭酒梨園數部觀者如堵酒闌樂罷長卿幅巾白衲奮袖作漁陽摻鼓聲一作廣場無人山雲怒飛海水起立林茂之少年下坐長卿起執其手曰子當爲搥鼓歌以贈屠生快哉此夕千古矣 魏之瓊字考叔上元人業丹青以餬口取給於十指不以千人軒車過訪不一報謝惟招之飲酒則往清言獻酬坐無考叔不樂也

中州野錄樂平彭福字綏之舉進士守泰州爲人剛介自守以直道忤於部使者而歸時寓鄱陽有

故舊新登進士第者歸饒綏之具酌邀之值微雨累速不至綏之遣以詩云倘來名利若游塵何事痴兒太認真咫尺泥途行不得山陰雪夜是何人人多傳頌之

觚不觚錄河南淮北山陝諸郡士夫多仍王威寧康德涵之習大小會必呼伎樂留連宿飲至著之詞曲不以爲恠若吳中舊有之則大槩考察削籍不堪復收者旣而聽用在告諸公亦染指矣又旣而見任陞遷及奉使過里者復瀾倒矣乃至居喪亦輕縑白紵左州侯右夏姬以縱游湖山之間從人指目了不知忸嗚呼異哉 余在山東日待郡守禮頗簡留飯一次彼必側坐雖遷官謁辭送

之階下而已遣人投一刺亦不答蓋其時皆然其後復起累遷山西按察使一日清軍提學二道偶約余同宴二郡守升官者置酒於書院余甚難之第令列名與分而辭不往乃聞具糖席張嬉樂具賓主縱飲夜分而罷頗以爲恠後問之余弟乃知近日處處皆然不以爲異也 余初任山東時

布按二司後堂無留郡守坐者留之坐則必於私衙雖設飯無害而起官至山西臬則自守以至倅理無不留坐後堂者矣當時撫按不留郡守令坐司理縣令行取亦只立待茶而已今兩直隸至留飯矣聞之各省尙不盡然

賢奕編黃憲副公卷解綬歸性故孤介惻朴而甚好客客至座已徐起臨庖服膺鼻衣治具具無兼味治畢乃盥手更衣出率以爲常耿先生一日偕元孚周進士候公歡甚縱談名理因及疆場時事奮然有請纓之志移日不輟已有婢從屏間稟曰烹雞熟矣請割時劇談方適公曰少需如是者三而公談益劇乃命婢曰汝姑自割既供饌出臧肋狼藉不爲意也先生退謂元孚曰吾與子今幸游羲皇世矣相與嗟嘆不置云

浙之長興里人某事母有至性其舊業俱以養母故至衰落其從

父一日飲諸姻呼孝子侍嫺多豪貴人饌具腆甚孝子時時左右盼伺賓所不顧急摘諸甘脆裹納袖中紙盡袖盈盈矣酒酣主人出金卮飲貴客貴客不勝酒置卮樓簷間覆以瓦先間歸俄侍者報亡其卮衆客約曰請急扃戶令人袒撿之必得乃已孝子兩手捫袖中至羞澀也倉卒不得計卽謬曰由我無何貴客憶前卮乃折簡主人語以其故主人如言撿之得急呼孝子至孝子猶謬對如初從父曰癡兒吾業已得卮矣顧若何苦自誑負不違名孝子始吐實淚淋漓下曰某苦不能勉奉母氏懼而兒女態若此比諸貴客在設令把我袖將詬我且重爲叔父羞故寧爾爾從父大感悟乃召前上客遍語之曰是子如是如是吾終不忍使孝子無以爲悅分其產令得終奉母焉

子祭酒陳敬宗師道卓立名重一時豐城侯李公隆居守於先生最所敬重過其第必留宴宴或以家姬作樂談笑竟日未嘗一目之常以拇指掐中指自持翊巨眎其指甲痕猶在惟恐失色於人也其檢身之功如此此其所以模範多士云 劉公仁宅常與同僚約過除歲各具一肉一蔬或具肉二豆酒一壺同僚深訝其奢

江寧府志武晌號橙墩溧水人家金陵富而好學能仗義晌有妾蘇氏善持家嘗宴客失金杯一隻諸僕驚索蘇氏曰無容覓已收入矣客去謂晌曰杯實亡去然公平日好客任俠豈可以一杯之故而令座客不歡乎晌善其言

百可漫志近日翰林諸公飲宴有供湯未至欲去且留者席尊出題曰東面而征西夷怨南面而征北狄怨請諸公破之皆不喻其意只如本旨席尊曰皆不是諸公曰如何才是曰只是等湯滿坐捧腹

宴集部雜錄

詩經豳風七月章九月肅霜十月滌場朋酒斯饗

小雅常棣章儻爾籩豆飲酒之飫兄弟既具和樂且孺

六月章吉甫燕喜既多受祉來歸自錫我行永久飲御諸友魚鼈膾鯉侯誰在矣張仲孝友

正月章彼有旨酒又有嘉穀洽比其鄰婚姻孔云念我獨兮憂心慙慙

楚茨章爲賓爲客獻酬交錯禮儀卒度笑語卒獲

朱注

主人酌賓曰獻賓飲主人曰酢主人又自飲而

復飲賓曰酬賓受之奠於席前而不舉至旅而後少長相勸而交錯以徧也

禮記孔子燕居食饗之禮所以仁賓客也

揚子修身篇或曰日昃不食肉肉必乾日昃不飲酒酒必酸賓主百拜而酒三行不已華乎曰實無華則野華無實則史華實副則禮

詩小序伐木燕朋友故舊也自天子至於庶人未有不須友以成者親親以睦友賢不棄不遺故舊則民德歸厚矣

焦氏易林訟之大過啞啞笑言與喜飲食長樂行觴千秋起舞拜受大福

漢書文帝本紀文帝卽位詔酺五日

注

服虔曰酺音蒲文潁曰音步漢律三人以上無故羣飲酒罰

金四兩今詔橫賜得令會聚飲食五日也師古曰醕之爲言布也主德布於天下而合聚飲食爲醕服音是也字或作脯音義同

抱朴子暢元篇宴安逸豫清醪芳醴亂性者也

顏氏家訓風操篇嘗有甲設讌席請乙爲賓而且於公庭見乙之子問之曰尊侯早晚顧宅乙子稱其父已往時以爲笑如此比例觸類慎之不可陷於輕脫

譚子化書有賓主之敬則雞黍可以爲大享豈在乎簫韶也

封氏聞見記士子初登榮進及遷除朋僚慰賀必盛置酒饌音樂以展歡宴謂之燒尾說者有虎變爲人唯尾不變須爲燒除乃得成人故以初蒙拜授如虎得爲人本尾猶在脫體既合方爲焚之故云虎尾一云新羊所觸不相親附火燒其尾則定貞觀中太宗嘗問朱子奢以羊事對

朝野僉載真臘國在驩州南五百里其俗有客設檳榔龍腦香合屑等以爲賞宴

全唐詩話李肇國史補云曲江大會比爲下第舉人邇來漸侈靡皆爲上列所占向之下第舉人不復預矣所以逼大會則先牒教坊請奏上御紫雲樓垂簾觀焉時或擬作樂則爲之移日故曹松詩

云追遊若遇三清樂行從應妨一日春敕下後人置皮袋例以圖障酒器錢絹實其中逢花卽飲故張籍詩云無人不借花園宿到處皆攜酒器行其皮袋狀元錄事同點檢闕一則罰金曲江之宴行市羅列闌闔爲之半空公卿家率以是日揀選東牀車馬闌塞莫可殫述

清異錄廣席多賓必差一人慣習精俊者充甌宰使舉職律衆

涑水家儀凡父母有疾子不宴遊

談苑都人士女正月十五後乘車跨馬郊野中爲探春之宴

聞見前錄洛中風俗歲正月梅已花二月桃李雜花盛三月牡丹開于花盛處作園囿四方伎藝畢集都人士女載酒爭出擇園亭勝地上下池臺間引滿歌呼不復問其主人抵暮遊花市以筠籠賣花雖貧者亦戴花飲酒相樂

清波雜志合堂同席以觴客客非其人則四座懼不治而飲易醉反以應接爲苦選詩從軍有苦樂但問所從誰或欲易從軍爲飲酒飲酒欲懼無由自醉得勸則沈湎勸尤在乎勸侑辭遜之間五十年前宴客止一勸今則巡杯止三勸則無算顛仆者相屬不但沈湎而已亦見風俗隨時奢儉之不